

LA VOIX
publicque,
AV ROY.

1624.

Case

F

39

326

1624fa

THE NEWBERRY
LIBRARY

LA VOIX
PUBLIQUE
AU ROY.

IL y a quelque temps, Sire, que l'on a
veu courir par Paris, & dans vostre
Cour, vn certain petit liure, intitulé (Le
Mot à l'Aureille) comme s'il eust conte-
nu tous les mysterieux secrets de vostre
Estat, ce qui a rendu vn chacun desireux
d'en entendre la lecture; de sorte qu'il a
seruy d'entretien à toutes les bonnes cō-
pagnies, parmy lesquelles chacun s'est
mellé d'en dire son opinion: En quoy les
iugemens se sont rencōtrez assez diuers.

Les vns soustenans que cest escrit n'e-
stoit remply que d'impostures; autres au
rebours qu'il ne falloit mettre la main à
la plume pour en raconter si peu; autres
que cest Escriuain ne s'estoit amusé qu'à
depeindre les deffauts exterieurs du Sur-
intendant, sans coter les fautes qu'il cō-
me contre l'Estat; autres s'estomac-
quoient contre cet escrit, sans en pouuoir

dire les raisons ; autres asseuroient qu'il y auoit assez de verité pour seruir d'aduer-tissement au procez de la Vieuille. Mais tous se sont rencontrez & demeurez d'accord que ce n'auoit esté que la passion qui auoit animé cest auteur, lequel d'abord se fait assez cognoistre pour vn captif pensionnaire, que le despit de se veoir biffé de dessus l'estat a mis aux champs pour declamer contre le Marquis, tout prest à chanter la palinodie, & de le louer hautement comme le plus parfait des hommes, au cas qu'on le veuille restablir & luy faire toucher finance, ainsi qu'il se peut facilement recueillir par la lecture de son discours.

C'est bien la verité, Sire, que la calomnie & la flatterie sont ordinairement les deux puissants fleaux qui persecutent & ruinent tous ceux qui sont esleuez aux grandes charges, & qui par diuers moyēs sapent insensiblement leur fortune : la mesdisance enuieuse s'efforçant de noir-cir toutes leurs actions, & la complaisance flateuse avec laquelle on les chatouille en leurs erreurs, est celle qui faict perir tous les iours la plus part des Grands

dans l'entretien de leurs deffauts.

Qui se peut garantir de ces deux perilleux escueils, se peut dire heureux & sage tout ensemble. Le premier s'éuie par vne suite de genereuses actions, lesquelles avec le temps r'ameinent les passions à la raison, & faict bouquer l'enuie; la vraye vertu n'estant subiette à s'estonner par le bruit d'un vaudeuillé. Et pour le second, l'homme ne s'y laisse surprendre, quand il a plus d'apprehension de faillir, que de presumption d'auoir bien faict.

Or ce que i'ay maintenant à représenter à V. M. n'est pas vn discours de mesdisance, ny vne raillerie complaisante, c'est vne verité la plus importante, Sire, qui puisse estre aujourd'huy annoncee à vn grand Roy, dans l'vrgente necessité du reestablissement de ses affaires. Ce n'est pas aussi la pensee d'un simple particulier, mais celle de tous les gens de bien, & de tous les iudicieux personnages de vostre Estat. En vn mot, C'est la vo. x publique.

Chacun scait, & l'experience a peu faire cognoistre à V. M. que tout le bon-

heur d'une Monarchie despend de la composition du Conseil du Prince ; S'il a près de sa personne, ou dans l'administration de ses affaires des gens bien censez, d'expérience solide, & de probité reconnue, assuremēt son regne est heureux, le corps de son Royaume s'affermir dans l'ordre, & la prospérité remplit ses subjets de biens, à la gloire du Prince & benediction du peuple. Si au rebours ceux qui sont reconnus avoir basti leur fortune aux despens de leur Prince, & des ruines publiques, subsistent dans le credit, sans crainte d'estre recherchez, ny punis de leurs meffaits : Si les meschans s'y auctorisent, & les ignorans y tiennent les resnes du gouvernement, infailliblement le Monarque u& la Monarchie se consomment dans leurs propres confusions; le peuple languit sous l'oppression; & la calamité generale donne courage aux voisins d'en profiter l'usurpation, & d'en avancer la ruine.

La memoire des choses pāsseees, Sire, peut faire ressouvenir V. M. si ceste these est veritable, ou non. Et pour luy faire cognoistre clairement que tous les mal-

heurs qui ont affligé vostre Couronne ont pris leur source de ce deffaut, ie ne craindray de représenter succinctement aux yeux de V. M. les choses qu'elle a veu elle mesme durant ces années dernières. Que si quelques bons Peres luy ont quelques fois persuadé, que les pechez, ou desobeïssances de ses subiets, auoient attiré l'ire de Dieu sur nos testes, & procuré les calamitez qui ont opprimé la France, tant du temps de la Ligue, que depuis le coup parricide qui a porté le Roy vostre pere au tombeau; on leur peut aussi alleguer, Sire, que l'infidelité & ignorâce de ceux, ausquels V. M. auoit confié le maniment de ses affaires, y ont contribué beaucoup plus que les pechez de vos subiets, que la malice estrangere a sceu abuser de faulx pretextes, à quey mesme nostre foiblesse a contenu pour complaire à des dominations estrangeres, qui ont sceu d'autre costé astucieusement gagner les esprits de ceux ausquels V. M. s'est confié le plus.

Si tous ceux qui ont possédé l'honneur de vos bonnes graces, & entrepris l'administration de vos affaires, eussent eu les

intentions droictes, & autant pensé à vous seruir, qu'à establir leur fortune, assurement, Sire, V. M. n'auroit resenty les desplaisirs qu'elle a receu, son Estat n'auroit esté desolé comme il est, ny le pauvre peuple souffert les miseres qu'ils endurent encores aujourdhuy.

Permettez, Sire, que ie prenne vn peu les choses de plus loing, disons que Villeroi & le Chancelier Sillery avec leur fausse reputation de probité imaginaire, ont empoisonné la plus part des esprits de vostre Conseil, & par leur premiere conuiuence avec le Marquis d'Ancre, ont ietté les premiers fondemens de tous nos malheurs, chacun d'eux n'ayant pensé qu'à regner, ou à complaire à autrui pour regner, sans se soucier que deuiendroit V. M. ny la Roynie vostre Mere, ny l'Estat, pourueu qu'ils subsistassent en credit, à quelque prix que ce fust, c'estoit le but de leur ambition, & comme chacun d'eux vouloit commander absolument, cela fut cause que ces trois ne purent durer longuement en bonne intelligence.

A ces trois succederent trois autres
avec

avec leurs supposts, lesquels au lieu de prendre exemple, sur le courant de la fortune de celuy qu'ils auoient fait tuer, feirent au contraire cent fois pis, que ceux en la place desquels ils s'establirent.

A la verité le Marechal d'Ancre dissipa les finances de la Bastille avec le consentement de Villeroy & du Chancelier, à quoy Mangot, Barbin, & l'Euesque de Luçon ne resisterent pas comme ils deuoient; Puis sur la fin il persecuta les Grands du Royaume: mais Luyne non content d'auoir rauy les grandes richesses de cet estranger, il a volé à la face du Conseil, le plus beau du Domaine de V. M. & tous les plus clairs deniers de vostre Espargne, & sans considerer le bien de vostre seruice, il s'est tout à fait ietté dans la faction d'Espagne pour s'appuyer contre la Royne vostre Mere, s'estant si estroitement ligué avec l'Espagnol, qu'en sa faueur il a fait en sorte qu'on enuoya le Duc d'Angoulesme en Allemagne, pour y faciliter les affaires d'Austriche: De plus nous auons abandonné tous les anciens alliez de ceste Couronne, interrompu l'intelligence durant quatre ans

x

avec les Estats de Holande, mis en nonchalancela conseruation des Suiffes, cōsenty à la prise de Iulliers, du Palatinat, de la Veltoline, mesprisé l'alliance avec Angleterre, & fomenté la guerre ciuile au milieu de vostre Royaume.

Non contant de tout ce que dessus, pour retirer quelque argent qui estoit au Mont de Pieré de Rome, il a de haute lutte restably les Iesuittes dans Paris, cōtre les formes ordinaires de la Iustice, & notables Arrests de vostre Parlement. En vn mot le Mareschal d'Ancre a troublé l'Estat, en attaquant quelques Seigneurs du Royaume, & Luyne pour s'agrandir a sappé les loix fondamentales de la Monarchie, ayant si dignement seruy le Roy Catholique durant qu'il a gouuerné, que son Ambassadeur mandant des nouuelles à Bruxelles escriuit ces mots en sa lettre, (los negocios de Francia van como lo deseamos.) Et de faiēt l'Espagnol n'eust sceu souhaitter autre chose que ce que nous auons faiēt pour l'establissement de ses affaires, le tout au grand preiudice de celles de V.M. & de la Couronne.

Voila, Sire, comme les bons Conseillers ont abusé de vostre bonté. Cependant si iamais pauvres creatures furent obligées à vn grand Prince, c'estoit Luyne & ses freres. Chacun sçait & la pluspart de la France a veu ceste histoire, & si V.M. daigne faire parcourir sa memoire sur tous leurs deportemens durant l'administration qu'ils ont eu de vostre Royaume, elle trouuera qu'il n'y eust iamais de plus ambitieux coquins, de plus ingrats seruiteurs, de plus hardis imposteurs, de plus signalez voleurs, & de plus perfides ministres, la memoire desquels deuroit estre execrable à la posterité, & maudite des viuans, afin de faire veoir au monde que V.M. hait les meschans, & qu'elle a du ressentiment du mal qu'on luy faict.

C'est en vain, Sire, d'esperer qu'un grand Monarque puisse estre dignement seruy s'il ne punit les forfaitures de ses Ministres, & ne condamne la memoire des scelerats. Outre que le Prince & l'Estat s'en trouue mieux secouru; cela sert encore à contenir les esprits mal-faisans en leur deuoir, l'experience faisant co-

gnoistre que tel a exercé vne charge honorablement & en homme de bien sous vn Roy Iusticier, qui eust faict tout le re-
bours sous vn Monarque trop clement. Ainsi vn Estat corrompu comme celuy de France a besoin d'exemple de punition, si on veut contenir les hommes en leur deuoir & refrener leur malice, autrement il n'y a rien de plus certain que tout continuera à aller de pis en pis.

A l'insolence de ces trois freres, Puisieux & le Chancelier ont succédé, l'vn fol à porter marotte, & l'autre malicieux comme vn vieux singe, qui par bon-heur a eu plus de reputation à contrefaire l'homme de bien qu'il n'a eu de prudence à le tesmoigner par effect, estant vne maxime infallible que iamais Patelin ne fut iudicieux. La multiplicité de ses actions sordides sont preuues suffisantes du naturel du personnage, qui n'a sceu sagement viure dans le monde, ny honnorablement s'en retirer, quoy qu'il en ait eu toutes les occasions à souhait, & le pou-
voir tout ensemble, s'il eust esté doié d'autant de preuoyance, que de sale aua-
rice.

Cependant, Sire, vostre Estat a pati grandement par les exorbitantes fautes que telles sortes de gens ont commises, iusques là qu'il y va de la honte pour vostre Couronne de les mettre en lumiere. C'est pourquoy ie m'en tais pour pleurer les malheurs où ils ont plongé vostre Royaume, à quoy il est quasi comme impossible de pouuoir remedier, sinon par vne grace speciale de Dieu, vigilance de V. M. & bons aduis des Ministres de l'Estat.

I'ay estimé necessaire, Sire, de vous ramenteuoir toutes ces choses, affin qu'en les repassant par la memoire, elle iuge plus facilement combien il importe d'establiir des personnes gens de bien, fidelles & capables dans son Conseil, puis que tant de malheurs sont arriuez & peuuent encores arriuer, si V. M. ny pouruoit par la prudence.

C'est donc avec tres-grande raison, Sire, que i'ay proposé dès le commencement à V. M. que le bon-heur & la gloire d'un Prince depend de l'establissement d'un bon Conseil: cela estant ie la supplie tres-humblement de considerer ce qu'el-

le peut esperer maintenant de ses Conseillers, & auoir agreable que ie luy rapporte en ce discours quelle croyance on en a, & ce que i'en ay recueilly.

Vostre Conseil est à present composé de la Royne vostre Mere, des Cardinaux de la Rochefoucault, & de Richelieu, du Connestable, du Garde des Seaux, & du Marquis de la Vieuille. Voila, Sire, les six personnes qui sont admises dans le secret de vos Conseils. Reste maintenant à représenter à V. M. comme les choses se passent, ce qu'on espere de la restauration des desordres, & ce que la Voix Publique dict de ces personages. Commençons par la Royne vostre Mere.

Chacun vous louë, Sire, d'auoir introduict ceste vertueuse Princeesse dans vostre Conseil, c'est vne action qui redonde à l'honneur de l'un & de l'autre, & vn tesmoignage d'amour & de iustice, dont le public se resiouit, d'autant que de ceste bonne & necessaire intelligence depend la tranquillité du Royaume, & de ceste estroite vnion la ruine de tous ceux qui voudroient se mesler de broüiller vostre Estat, ainsi qu'ont fait plusieurs, qui sous

pretexte de vous servir, ont semé de la diuision entre vos Maiestez pour s'emparer de vostre auctorité, & establir leurs affaires.

Nul ne doute, Sire, que V.M. n'aye du bon-heur de conferer avec la Royne sa Mere sur les choses importantes de son Estat; d'autant que l'experience qu'elle a de ce qui s'est passé, peut grandement servir à la rencontre des occurrences des affaires presentes, & ce qui doit vous consoler le plus, c'est qu'il semble que vous ne pouuez auoir aucune deffiance de ceste Princesse, estant certain qu'elle ne peut se diuiser d'avec V.M. sa grandeur, son bon-heur, & son repos dependant de la prosperité & bonne conduite de vostre Estat. Elle n'en scauroit trouuer ailleurs de plus asseurez, ny de plus honorables. Et d'autre-part V.M. ne se peut mieux fortifier contre les broüillons que d'entretenir ceste sainte correspondance, laquelle ne peut estre trauersée que par des esprits malins & diables incarnez.

Quant au Cardinal de la Rochefoucault, c'est vn Prelat digne veritablement de grande consideration; car s'il fait, ou

rollere le mal, on dit que ce n'est à mau-
uaise intention, son esprit & son corps
n'allant qu'entant que les Peres le pouf-
sent, employant toutes les forces de son
ame, non aux affaires de vostre Royau-
me, mais bien au soin d'introduire par
toutes vos villes vne fourmilie de Cō-
uents, au lieu des Eglises que feu son grād
pere a ruinees: comme aussi à conuertir
auec l'argent du Clergé, force Ministres,
en compensation de tant de pauüres Ca-
tholiques que son pere a assommez du-
rant les guerres ciuiles de la Religion.

Pour le Cardinal de Richelieu, les
Courtisans le tiennent raffiné iusques à
22. carats, & les clair-voyans ont opinion
que son naturel courageux l'engagera à
bien faire pour auoir de la gloire: car
estant habile & prudent, comme il est, il
n'y a point d'apparence qu'il aille chercher
autre appuy qu'en l'autorité legitime de
V. M. ny autre subiect pour employer la
grandeur de son esprit, que dans la bon-
ne conduite de vos affaires: autrement
tout le monde luy coureroit sus, & se-
roit descredité à iamais, qui est tout ce
qu'il doit apprehender.

Quelques

Quelques autres ont encores ceste esperance qu'estant issu d'un pere bon François, & qui comme fidelle subiect a si dignement seruy Henry III. durant les furieuses bourrasques de la Ligue, il imitera un si braue caualier; & que sans s'arrester aux interets d'Espagne, ny des Cagots, il embrassera ceux de V. M. comme un autre Cardinal George d'Amboise, à fin de releuer cest Estat menassé de toutes parts de ruines euidentes, s'il n'y est genereusement, ie repete encore genereusement, & promptement remedié.

Les merites du Connestable l'ont mis où il est, ceux qui le haïssent ne luy veulent mal, que pour raison qu'il ne fut iamais dans la cabale Espagnole, son genereux courage luy faisant desirer tous les iours d'estre plus sourd qu'il n'est, tant il a à contre-cœur d'entendre les choses qui se passent si contraires à l'honneur de V. M. & reputation de son Estat: son iugement net, & l'experience que l'aage luy a acquis, luy donne vne grande cognoissance des affaires du Royaume. Que s'il auoit l'auctorité de remedier aux fautes qui se commettent, la France receuroit le

secours qu'elle doit attendre d'un si grand personnage, auquel il n'y a rien à souhaiter qu'une prolongation d'annees, à quoy plusieurs se persuadent que Monsieur d'Espernon mesmes ne refusera de joindre ses vœux & prieres.

Le Garde des Sceaux a esté choisi du seul mouvement de V. M. C'est la verité, Sire, que chacun le tient pour homme plain de probité, d'integrité, & bien affectionné à vostre service, & auquel on peut appliquer ce que dit Solomon, (*Ab occursu faciei cognoscitur vir sensatus,*) il ne luy manque qu'un peu plus de courage & de hardiesse pour s'opposer à ce qu'il voit de mal devant ses yeux : Que si en cela il ne tesmoigne plus de vigueur, ce n'est pas qu'il n'en recoive du desplaisir en l'ame, mais c'est qu'il prevoit que ses iustes efforts seront inutiles, tant que V. M. donnera une entiere croyance aux conseils chimeriques de celuy qui s'ingere de vouloir gouverner tout seul.

Pour ce qui est de la personne du Marquis de la Vieuville, on dit que plusieurs des^s s'efforcent de persuader au mon^s si'il est tres-habile homme, mais il a

ce malheur que personne ny veut adiouster foy, non plus qu'aux nouvelles de l'arriuee de la flotte d'Espagne, on a beau publier son committimus, & raconter que c'est luy qui gouuerne tout, (ne per æquo) le public se fie aussi peu en sa conduite, qu'en la prud'hommie du fraizé Duret.

Il est vray, Sire, que quelques-vns soustiennent qu'il est copieux en belles conceptions, & que le Duc de Nevers & luy feroient les plus grands personnages de l'Europe, s'ils auoient la capacité de mettre leurs entreprises en execution: & que si le Marquis ne reüssit bien aux siennes, ceste disgrâce ne luy procede que de ce que tous les esprits sont dissipéz par la meditation perpetuelle de ses intrigues, dans lesquelles il oublie les solides, la reste ressemblant à ces caualles des pays Meridionnaux qui ne conçoient que du vent; ou à ces hommes incapables à la generation, lesquels meurent d'enuie d'embrasser leurs femmes, mais pour tout cela rien n'en reüssit au profit du mesnage. Voila en effect comme l'on dépeint la Vieuille, & ne croy pas que du Montier

le puisse crayonner de plus naïues couleurs.

Tous ces deffauts, Sire, sont grands en la personne d'un Ministre confident, neantmoins en voicy encore d'autres plus considerables, & qu'on tient inseparables d'auec luy, Auaoir vne agitation perpetuelle d'esprit & vn changement perpetuel de desseins, toutes ses resolutions n'ayants non plus d'arrest dans sa teste, que le vif argent dans le crisol d'un Orfeure, changeant ordinairement le soir ce qu'il aura resolu le matin, puis il retourne à ce qu'il a changé, ou faict des desseins tout nouveaux, avec des resolutions toutes nouvelles, allant ainsi de blanc en noir, & de noir en blanc, selon les diuerses conceptions qu'il se forme, ou aduis qui luy agreent, ressemblant de ceste façon à ceux qui ne guerissent iamais un mal à cause de la multiplicité des remedes desquels ils se seruent, pour n'en scauoir l'usage d'un bon. Toutes lesquelles perilleuses virevoltes, ne se peuuent faire, Sire, qu'auec un notable preiudice de vos affaires, lesquelles requierent un concert d'hommes solides & iudicieux;

autrement l'Archeuesque d'Aix aura raison de dire que vostre Estat ira tousiours sens dessus dessous, iusques à ce qu'il en ait la direction.

Venons maintenant aux quatre Secretaires d'Estat, il ne sera hors de propos d'en toucher vn mot, puis qu'ils sont du nombre des principaux Officiers du Royaume. C'est la verité qu'on tient qu'il n'y a rien à redire à leur affection, & quoy qu'ils soient trauersez en la fonction de leurs charges, il est certain que s'ils auoiēt vn peu plus de liberté d'agir, ils releueroient les manquemens qu'on leur met sus, & feroient paroistre qu'ils ne sont si incapables comme on les accuse. Pour Bulion il remarque assez les fautes qui se commettent aussi bien que le Connestable, & quoy qu'il gronde entre les dents, neantmoins il n'ose mordre de crainte que Tronson ne le visite.

Et d'autant que plusieurs declament à toutes heures contre les deportemens du Pere Sigueran, alleguans que c'est chose indecente à vn Confesseur de fureter continuellement parmy les Courtisans pour escumer des nouuelles. Je confesse,

Sire, que ie me fusse volontiers exempté de parler de ce personnage, de crainte que la verité n'offense, ou que la flatterie ne desplaise à quelques vns: mais puis que l'office de Confesseur est auourd'huy vne condition la plus cabaliste du Royaume; ie croy qu'il n'y a point d'offense d'en discourir vn mot en passant.

Le public desireroit, Sire, qu'il pleust à V. M. imiter pour ce regard la sagesse des Papes, & la prudence des Rois d'Espagne, lesquels se seruent bien de ces bons Peres, comme espions pour descouurer par leur entremise les secrets d'autrui, mais ils se donnent bien garde de leur declarer les leur, afin de ne point dependre d'eux, ny qui puissent iouer le double. c'est pourquoy iusques à present aucun Iesuite n'a eu l'honneur d'estre Confesseur de leurs Saintetez, ny des Rois Catholiques, ny des Roynes, ny des Infants & Infantes. Et de faiet par le traitté du mariage d'Espagne avec Angleterre, on auoit estably vn Pere Dominiquain pour gouverner la conscience de la Princesse.

Vostre Maiesté deuroit prendre exemple là dessus, Sire, & considerer les incon-

ueniens où la France est tombee, & où V. M. peut encore tomber en rendant la Confession du Loure hereditaire à la famille des Iesuittes, comme l'Empire dans la maison d'Autriche; d'autre costé les Euesques & Prelats de vostre Royaume deuroient aussi rougir de honte de rollerer qu'ils soient exclus de l'administration de ce Sacrement en la personne de V. M. l'autorité de laquelle n'a esté ataquée que par ceux de ceste Societé, lesquels pour brauer tout le Clergé, & se mettre en credit parmy les Princes Estrangers se veulent perpetuer la direction de vostre ame, de celle de la Royne Mere, de Monsieur, de Madame, des Princesses de Condé & de Conty, du Comte & Comtesse de Soissons, & de la pluspart des Seigneurs & Dames de vostre Cour; insques là, qu'ils sont si friands de ce mestier, que le Pere Arnoul & le Pere Sigueran s'entregourmeroient volontiers pour veoir à qui depossederà son compagnon, afin d'entrer en credit pour cabaler les benefices, sur lesquels ils font tous les iours mille friponneries. Hé! puis, Sire, escoutez prescher ces bons Peres sur le

mespris de la Cour.

Le feu Roy Henry III. ayant choisi pour son Predicateur le sieur Rose Euesque de Senlis, au bout de quelques annees il desira qu'il fut aussi son Confesseur, surquoy ce Prelat s'excusa, remontrant au Roy que du iour qu'il auroit ouy S. M. en confession, il falloit qu'il se desistast de la predication, d'autant qu'il croyoit estre mal seant dans l'esprit d'un Predicateur de declamer en chaire contre les vices, qu'il scait que son Souuerain luy a reuelé sous le Sceau de Cōfession. L'enuie que les Iesuittes ont de cōtinuer leurs cabales dans le Louure, les empeschera bien d'ensuiure ny d'imiter en ce point l'opinion d'un si sage Euesque, ie n'en veux dire d'auantage, me suffisant d'auoir representé comme les autres Princes se gouernent en cela, & d'auoir aduertty V. M. de prendre garde aux perils qui en peuuent arriuer.

Voila, Sire, tous les Ministres & principaux Officiers par les ressorts desquels vos affaires sont conduittes aujourdhuy, ensemble le iugement que la Voix Publique faict de chacun d'eux en particulier.

lier. Et veritablement on croit que V. M. peut estre vtilement assistee de si grands personages, pourueu que la confusion ne se mette parmy eux, & que vous empeschiez par vostre prudence que la charrette n'aille deuant les bœufs (ainsi que disent les bonnes gens des champs) c'est à dire que les plus impertinent ne gourmande les plus sages, car en ce cas il est impossible que vostre Conseil vous puisse dignement seruir.

Pour à quoy remedier il seroit tres-à propos, Sire, que V. M. ordonnast tant pour la seureté de ses affaires, que pour la descharge de ses Ministres, que toutes les propositions qui se feront, ou resolutions qui se prendront, ayent à passer par le concert & pluralité des aduis de vostre Conseil. La question est maintenant de sçauoir si les choses se gouernent de la sorte, & ce qu'en dit la voix Publique.

Le bruit est par tout, Sire, que la Vieuvaille fait le Mareschal d'Ancre, le Luyne, le Puisieux, & la Puisieuse tout ensemble, presumant tant de luy que dans vostre Conseil il entreprend de proposer, deliberer, & de resoudre tout, se faschant

si les Secretaires rapportent, & si les autres ne concluent aux fins de cest vnique Senateur. Ainsi il ne faut qu'un fou, dit le proverbe, pour troubler toute la feste.

Le plus grand malheur qui accompagne les Princes, Sire, c'est quand par vne trop grande confiance, ils ne prennent pas garde à la capacité de leurs fauorits, c'est quand ils ne scauent cognoistre la portee de leur ceruelle, dont s'ensuit ordinairement la ruyne du maistre & du valet.

Et de verité, il n'y a rien ou la foiblesse d'un esprit paroisse si tost que dans le maniment des affaires publiques, le chariot du Soleil brule le ciel & la terre entre les mains de Phaëton, & faict produire toutes choses abondamment en celles de Phœbus, c'est pourquoy il faut auoir vne grande lumiere naturelle, vn iugement seur, & vne grande experience pour sagement tenir le timon d'un Estat, sur tout quand il est question de preuenir les inconueniens & desmesler prudemment les embusches qui se rencontrent dans l'enueloppement des astuces du monde; qui n'est doué de ce talent, il va à tastons

dans les affaires, & bronche au milieu des beaux chemins.

Souuenez-vous encore, Sire, qu'il importe à la gloire d'un grand Roy, d'auoir des Officiers bien censez & de grande reputation. C'est surquoy les voisins iettent plustost les yeux; que s'ils reconnoissent que les Ministres soient peu capables, ils proiectionnent là dessus les fondemens & bons succez de leurs machinations.

Que pourroit penser vn Ambassadeur si on luy raportoit par plaisir ce que disoit il y a quelque iours vn certain palefrenier de Paris, lequel considerant son compagnon qui sangloit mal vne haquenee, eust l'effronterie de luy reprocher tout haut, qu'il sangloit son cheual de trauers comme la ceruelle de la Vieuille. Et vn autre se plaignant de ne pouuoir trouuer logis dans Compiègne, on luy dit qu'il ne falloit aller que chez le Marquis, d'autant qu'il auoit tousiours force chambres vuides en la reste. Hé? quoy, Sire, V. M. ne croit-elle pas auoir interest en telles reparties & le public pareillement?

Tenez aussi ceste maxime pour infail-

xviij

ble, Sire, de n'estre iamais bien seruy de personnes qui n'ont autre Dieu que leurs interests, autres meditations que leur grandeur & autre plaisir que dans les intrigues. La principale marque d'un bon Ministre estant d'oublier tout a fait ses passions & ses affaires pour vaquer entierement à celles de son Maistre. Scachez, Sire, que le Marquis n'est pas de ceste opinion, sa principale occupation n'estant que de se vanger, & de s'establir à quelque prix que ce soit, ainsi que j'espere faire voir à V. M.

Quand il a trauaillé à l'exclusion du Chancelier & de Puisieux, ce n'a esté que pour empieter leur credit. Quand il a fait chasser le Colonel ce n'a esté que pour glisser des creatures aupres de Monsieur. Ce qui l'a empesché d'y mettre le Duc d'Angoulesme, c'est qu'il n'a sceu comment le faire gouster à V. M. & de plus il redoute la Royne vostre Mere qu'il scait auoir le naturel trop bon pour se taire en vne telle occasion.

Interrogez Marcheulle, Sire, & vous apprendrez ce que la Vieuille luy a proposé autrefois pour le gagner, & en outre

vous sçaurez qu'elle fidelité il y a en luy. A cela il dira qu'il faisoit cest intrique avec Marcheuille pour d'estacher Monsieur d'avec le Colonel : mais il faut qu'il aduoüe aussi que les gens de bien ne font point relles vilanies , ny ayant que les fourbes comme luy , qui au ieu du Taro-rot se seruent de telles excuses. Mais, Si-
re, voicy bien d'autres fleurets dont il s'escrime.

Il faiet sçauoir des merueilles à Monsieur le Prince par les Ducs d'Angoulesme & de Montmorency, luy promettant de le faire reuenir en Cour, quoy qu'il y aye (dit-il) beaucoup de difficultez, à cause de l'extreme auersion de V. M. & mau-
uaise volonté que la Royne Mere luy porte.

N'est-ce pas là vn bon seruiteur qui declare les auersions de son Maistre, & qui se veut acquerir des amis à ses despens ? Il a dit à des gens qu'il conserue Monsieur le Prince pour vn dernier refuge à sa fortune. Que s'il veoit ne pouuoir s'ayder de la Royne Mere, il s'aidera de Monsieur le Prince pour seruir à ses passions, & pour l'engager d'auantage à sa

xxx

cordelle, il luy promet d'empescher que Monsieur se marie. Que s'il ne peut gagner Monsieur, il donnera tant de defiances de luy au Roy, qu'il sera contraint de faire ce qu'il voudra.

Il a asseuré Madame la Côtessle qu'il n'y auoit que la Royne Mere qui trauersast le mariage de son fils, & d'autre part il a dans sa teste des desseins de faire reuenir Monsieur le Prince pour s'vnir avec Monsieur le Comte, & faire vn party.

Il asseure la Royne d'une passion extraordinaire à sō seruice, luy tēmoigne qu'il veut dependre d'elle plus que de personne du Royaume, afin de se pouuoir apuyer de son auctorité au cas qu'elle eust des enfans, cependant Dieu sçait quels pasquets il luy a autresfois rendus, & comme il l'a sert a plats couuets.

Que ne fait-il point, Sire, pour faindre de vouloir gagner les bonnes graces de la Royne Mere, à laquelle neantmoins il est bien aise d'imputer le blasme du tort qu'il fait à autrui, & de s'en seruir pour faire ombre à Monsieur le Prince, & au bout de là quels mauuais offices ne luy rend il pas? par les mesmes voyes?

En après il proiette encore vne autre corde pour son arc, qui est de restablir le Pere Arnoul, & de donner les affaires estrangeres à quelqu'un à sa poste, l'un dit il, pour vous tenir par la conscience & l'autre pour posseder l'oreille secrette de V. M.

Telles ruses ne sont elles pas du diable, sera il dit que le premier Roy de la Chrestienté se serue d'une personne qui n'a autre but que ses propres interests, autre sagesse que celle qu'il emprunte de la teste de Loyeuse, autre espee que celle des Vyardes, ny autre conscience que celle avec laquelle son beau-pere a administré & administre encore vos Finances.

Sire, ouurez les yeux, on merite quelquefois vne bonne renommée par soy-mesme, & quelquefois aussi on ne laisse pas d'estre deschiré en sa reputation par les faits d'autrui. Tout le monde tremble d'apprehension quand on considere qu'un fou esceruelé tient le gouvainail de vostre Estat.

Souvenez vous, Sire, que trois mois deuant que vous luy fissiez cest honneur de l'admettre dans l'employ de vos affaires, vous luy fistes manger du foin & de

l'auoine fricassez dans la poisse, comme aliment propre aux cheuaux comme luy. Escoutez le mot à l'aureille, vous y remarquerez les façons ridicules de negociier, considerez ses actions, faictes vous conter qu'elle estoit l'humeur de son pere, qui ne porta iamais pour espee, non plus que son fils, qu'un cousteau tranchant des deux costez.

Ce n'est pas iusques à vos Comediens, Sire, qui ne dient que les deportemens du Marquis sont capables de fournir d'estoffes pour illustrer toutes leurs Comedies. Pantalonn estant allé il y a quatre mois trouuer le Surintendant pour luy faire signer vne Ordonnance de quelque somme que V. M. auoit donné à sa compagnie, d'abord que le Marquis le veid entrer dans sa chambre, vne Mathurina de le saisit si soudain, que sans dire gare, il se mit à faire mille Pantalonnades. Le seigneur Pantalonn tout au rebours se met sur sa bonne mine, & s'approchant de la Vieuille avec vn pas plain de gravité, luy dit gracieusement en luy presentant son papier (Seignore Marqueze V. S. Illustrissima a fatto il mio officio, adesso vo
la

la supplico di fare il suo y che voglia firmare la mia Ordonnança.) Ceste harangue fit rire vn chacun, & si le Colonel d'Ornano y eust esté, il eust esgayé l'aspect de sa froide mine pour en rire avec les autres.

Iugez Sire, iusques où passent les infirmités de vostre Surintendant, & si tous ces contes ridicules se peuuent faire du principal Ministre de vostre Estat, sans que cela ne redonde sur V. M. Et combien il est important de n'admettre dans le Conseil que des gens tous faicts.

Les Medecins tiennent pour maxime, que les experiences en personnes signalees sont tres-dangereuses; de mesme est il tres-dangereux, Sire, de confier le Gouvernement de l'Estat, à vne personne qui faict ses apprentissages aux despens de V. M. & de vostre auctorité. La reputation est celle qui doit promouuoir aux charges ceux que les Princes desirent employer! La Voix Publique leur doit seruir de guide, elle ne trompe iamais, d'autant que nul ne la peut corrompre.

Trois qualitez principales sont requises à vn homme d'Estat, à sçauoir la con-

science, le courage, & la prudence. Hé! quelle fidelité vn Prince doit il attendre d'une personne sans conscience, qu'elle iustice en peuvent esperer les subiects, & vn homme ardent à son interest n'est il pas capable de s'engager en toutes sortes de meschancetez, principalement quand il estime ses artifices assez grands pour desguiser ses malices à son Maistre.

Tout de mesme avec quelle fermeté vn homme sans courage, pourra il soutenir l'auctorité d'un Roy, quand son imagination se forgera l'ombre d'un peril qui n'a point de corps? les cornes d'un limaçon estans quelquesfois capables de le diuertir d'un genereux conseil, pour embrasser celui que la timidité luy persuadera estre le plus commode.

Combien, Sire, doit on apprehender les perilleux qui proquo, deceux qui n'ont aucune experience, que s'ils sont dangereux en Medecine, ils le sont encores davantage en matiere d'Estat, ou ordinairement il n'est pas permis de faillir deux fois.

Or est-il que vostre Surintendant, Sire, n'ayant ny conscience ny courage, ny

prudence, quels seruices en peut esperer V. M. ny vostre peuple dans les importants affaires qu'il est besoin de negocier à present, pour reestabliir les desordres du dedans & du dehors, qui menassent euidement vostre Royaume de grands malheurs, s'il n'y est genereusement & prudemment pourueu?

Et pour monstrier, Sire, que ce discours n'a aucune animosité particuliere contre le Marquis de la Vieuuille, sinon vne iuste crainte que son imprudence ne porte vostre auctorité & vostre Estat à vne dernière ruyne, que V. M. considere s'il luy plaist ce qu'il a faict pour son seruice depuis qu'il est dans le manimēt des affaires.

Tous les desordres du dedans du Royaume sont encores en mesme confusion qu'ils estoient par cy deuant, voire beaucoup plus grand, s'empirans tous les iours par les longueurs, perte de temps & remises que l'on y apporte, vostre peuple est plus surchargé de tailles à present que l'an passé. Les voleries se commettent plus impunement dans l'Espagne que par cy deuant, le beau-pere & le gendre avec tous leurs commis, s'entre donnans

l'esteuf l'un à l'autre. La Iustice s'administre à l'ordinaire, vostre gendarmerie est aussi mal payee qu'elle souloit : on n'a point chastié non plus aucun de ceux qui vous ont trahy , & ruyné vos affaires. Qu'à donc faict le Marquis, Sire, il dira possible qu'il a chassé deux Ministres, l'un fou, & l'autre meschant, mais il se gardera bien de dire qu'il tient leur place, & que luy & Beaumarchais font tout ce que faisoient Puisieux & le Chancelier, voire en vn seul mois, desrobans eux deux autant d'argent à V. M. que les deux autres en ont volé en leur vie. Qu'il ne se vente pas, Sire, du bon mesnage de vos finances: car si pour la mine il a espargné d'un costé, on luy fera voir qu'il a tres-bien sceu faire son compte de l'autre.

Sire, que V. M. preste seulement l'oreille, & elle entendra d'estranges choses sur ce subiet, qu'elle ouure les yeux & elle verra de quoy faire pendre vne vingtaine de Financiers, sans comprendre le Filou. Le Marquis a si grande peur qu'on les recherche qu'il desploye tous ses arti-

fices pour empescher l'ëuie qui en pourroit venir à V. M. Et c'est pourquoy il voudroit bien introduire le Pere Arnoul pour vostre Confesseur, Sire, à cause qu'il est grand confident du Beaumarchais, esperant par ceste voye, garantir son beau-pere de l'apprehension qu'il a d'vne confession generale.

Comment a-il sceu finement estouffer la volerie qui auoit esté faicte sur la garnison de Mets? Ceste griuelee en pouuoit bien descouurir d'autres, c'est pourquoy on a couru au deuant par derriere, en satisfaisant promptement les interressez, & ainsi la punition de ce vol s'en est allée en fumée.

Qu'à-on faict, Sire, des propositions de Luuigny & de Bourgoin qui crient tous les iours ouuertement; font ils escoutez?

Les artifices d'estournent toutes bonnes choses: aussi le Marquis se vante que quelque dessein qu'aye V. M. il se faict fort que s'il ne la destourne en vn iour; qu'il en viendra à bout en deux.

Qui a escludé dès le commencement la recherche du Chancelier, sinon la science

que la Vieuille a, que son beau pere est
 meslé dans les vols qui se sont faicts de
 vos finances? Et de faict, Sire, ie soustiens
 que Beaumarchais & la Vieuille ont
 desia volé plus de six cens mille escus à
 V. M. . Ie ne dis pas des millions comme
 d'aucuns, ie ne parle que de ce que ie sçay,
 estant tres-vray qu'ils les ont pris, y ayans
 plus de trois Officiers de qualité qui se
 soubsmettront à perdre la vie, s'ils ne le
 verifient. Et de faict si iamais V. M. va à la
 chasse aux larrons: elle verra qu'on luy
 en apportera les preuues toutes claires.

Il est constant que Puisieux a eu par cy-
 deuant vingt mille escus des Holandois
 pour estre payez du secours que V. M.
 leur donna l'annee derniere. La Vieuil-
 le l'a desia surpassé en ce poinct: car il est
 vray, & ie sçay d'un homme qui entend
 le Flamand comme le François qui les a
 ouy discourir entre eux, qu'il falloit in-
 teresser le Surintendant afin d'estre bien
 payez. Ie ne sçay pas au certain ce qu'ils
 luy donnent: mais ie sçay fort bien qu'il
 passe quarante mil escus tous les ans. Et
 cela a esté descouuert par vne voye mer-
 ueilleuse.

Il n'y a lieu, Sire, ou les gens de bien soient plus requis qu'au maniement des Finances, par ce que de là viennent les sources des larcins qui vous sont faicts, & toutes les oppressions que souffre vostre pauvre peuple.

Pour vos intendants, Sire, on les tient pour tres-hardis volleurs, il semble que la preuve en soit aisee, ayans desia esté chassez pour tels, & restablis pour la mesme cause, que si Duret s'y est maintenu, on peut attribuer ce bon-heur au thresor de son innocence.

Quant à celuy que Vostre Maiesté y a mis, il a tant d'enuie de monter d'un degré qu'il n'y a rien qu'il ne face pour s'agrandir.

Le Contrerolleur est fort bon personnage, nul ne luy peut desnier ceste qualité: mais ie m'asseure qu'il accordera qu'il y a quelque fois grande difference entre un homme de bien, & le plus habile homme du monde.

Que si on dit que la direction deuroit suppleer à ces deffauts, la Voix Publique dit qu'il semble qu'elle ne soit establie que pour approuver toutes sortes de

mauuaifes affaires, & non pour en représenter les inconueniens; ny ayant personne de ceux qui en sont qui ne craigne de tesmoigner qu'il est homme de bien, de peur que le President Cheualier ne prenne sa place au prix d'une infame dénonciation contre vne personne qui est aussi perduë d'honneur que luy.

Mais quoy, entre Chancelier & Cheualier il y a de la rhime, Sire, & si V. M. veut approfondir la recherche de leurs deportemens, elle y trouuera encore de la raison, & de plus la confiscation del'un fera capable de fournir à la dépence des fortifications de vos places frontieres: & celle del'autre aux frais de la leuee de cinquante mille hommes; ces deux saintes personnes estans riches de plus de trois millions d'or.

Si V. M. veut ioindre la chambre ardente (qui se deuroit nommer Chambre de charité) elle recouvrera finances pour faire la guerre deux ans. Tout cela est de Iustice, Sire, car il vaut mieux rechercher ceux qui ont volé vos thresors, & qui ont entre leurs mains tout l'argent de la France, que de surcharger le pauvre peuple qui

qui à peine peut respirer: Mais la question est maintenant si vostre Surintendant & son beau-pere agreeront ceste sainte inquisition?

Pour monstrier que non, & que Beaumarchais craint l'examen de sa conscience, il ne faut qu'entendre ceste petite histoire. Bardin estant alitté d'une grande maladie, il eust vne vision durant les ardeurs de sa fieure, & luy sembla veoir la Vierge Marie qui luy disoit, Mon enfant si tu veux estre guery & sauué, dis à ton Maistre qu'il fasse restitution de ce qu'il a volé. Beaumarchais venant visiter Bardin, il ne manqua de luy rapporter ce qu'il auoit ouy de la Mere de Dieu. Ceste harangue despleut si fort au beau-pere de la Vieuille, qu'il ne se peust contenir de dire à Bardin, Mon amy vous estes vn Badin, sçachez que la Vierge Marie ne se mesle pas de nos affaires, pensez à vous guerir & ne refusez plus.

Ainsi se gouernent ceux qui veulent mourir riches; cependant, Sire, vous portez le nom de Iuste. Hé! y a il rien de plus iuste que de faire rendre gorge à des sangsues qui se sont gonflées du sang le

plus pur de vos subiets ? Que V. M. confidere qu'il n'y a aujourdhuy Financier qui ne viue en Seigneur , & qui ne soit meubl  en Prince : la pluspart d'entr'eux pour s'exempter du gibet s'estans alliez aux plus illustres maisons de vostre Royanne.

N'est-ce pas chose horrible de veoir vn Iacquet , auoir espous  la niepce du Duc de Mayenne ? la fille de Feydeau le Comte du Lude ? celle de Beaumarchais, le Marechal de Vitry ? celle de Montmor, le fils du Marechal de Themines ? celles de Herbault , les Comtes de Palluau , de Bury, & Marquis du Sel ? celle de Fabry, le sieur de Pampadour ? Quoy plus, vn Commis de l'Espargne a donn  sa fille au Marquis de Mont-rauel avec cent mil escus. Villautrais qu'on croyoit deuoir estre pendu apres auoir desrob  vn million au siege de Montpellier, a mari  sa fille au neueu du Cardinal de la Rochefoucault pour s'appuyer de l'escarlatae ; & ainsi d'infinis autres , les enfans desquels brauent l'ancienne Noblesse , de maniere que la science de bien desrober est l'vnique chemin de

s'annoblir aujourd'huy en France.

C'est à tel abus que la Vieuville deuroit remedier, s'il desiroit vtilement servir vostre Estat, & en cela il feroit vne action plus glorieuse que celle qu'il fist il y a cinq mois à vne personne qui s'alla plaindre à luy touchant vne exaction.

Vn certain quidam ayant par Arrest du Conseil obtenu l'adiudication d'une ferme, & le Greffier ne luy voulant delivrer son Arrest, qu'il n'eust mil escus pour son vin, ils tomberent à la fin comme d'accord à cinq cens escus. Le fermier neantmoins s'alla plaindre à la Vieuville de ceste extorsion, luy confessant qu'il luy faschoit fort de bailler vne telle somme, mais qu'il donneroit franchement quatre cens escus audit Greffier, lesquels il luy auoit desia plusieurs fois offert. Le Surintendant promit à cest homme qu'il luy feroit faire raison, disant à ce Fermier qu'il luy mist entre les mains les quatre cens escus qu'il auoit offert, ce qui fut fait & aussi tost le Marquis enuoya commander au Greffier d'apporter l'Arrest en question deuëment expédié. Ainsi la Vieuville ayant l'argent & l'Arrest, en

presence des deux parties , il deliura luy
mesme l'Arrest au Fermier & prit douze
pistolles qu'il bailla au Greffier pour les
expeditiones. Et quant au surplus de ladite
somme de quatre cens escus, il le retint;
quelques vns asseurent qu'il le porta à V.
M. luy disant pour faire le bon valet , qu'il
auoit gagné cest argent par son industrie,
vous sçauiez si cela est vray. Cependant
considerez, Sire, si ceste action est ny ho-
norable ny de Iustice. Vn homme bien
censé eut faict rendre l'Arrest au Fer-
mier gratis, & pour l'extorsion enuoyé le
Greffier en vn cul de fosse, ou interdit de
sa charge, & puis le public admirera l'es-
prit de ce sage Surintendant?

Sçachez, Sire, qu'il n'y a mestier au
monde si aisé à apprendre que celuy des
finances, en dix iours vn homme y est
Docteur, tout le secret n'est que d'esgaler
la despence à la recepte, & d'empescher
que son Maistre ne tombe dans la neces-
sité d'auoir recours aux moyens extraor-
dinares. Tout bon Oeconome sçait cela,
vos Thresoriers de l'Espargne en sçauent
mieux l'vsage pour eux, que pour vous.
Herbault qui n'est pas grand personna-

ge aux affaires d'Estat , a faict veoir qu'il estoit tres habille homme dans le calcul, il ne faut estre que hardy à prendre, & estonté à refuser , pour deuenir en peu de temps bon Financier.

Non , non , perdez ceste croyance, Sire , que vostre Surintendant face mieux vos affaires que les siennes, si cela estoit il n'y auroit pas sept mois que deux Flamments Orfeures de la vallee de misere, sont continuellement occupez à grauer seulement les armoiries sur vn nombre incroyable de grands vases qu'il a faict faire, ny ayant rien de plus certain qu'il mettra plus d'argent dans ses coffres, que dans vostre Bastille, le monde scait alléz qu'il n'a point la capacité de Suilly, ny la probité de Champigny, ny la fidelité de du Halier, ny le courage de Schomberg, que Monsieur le Prince estime seul capable de bien seruir V. M. à sa mode.

Qu'ainsi ne soit, Sire, voyons les grãds profits que la Vieuille a faicts à V. M. il a retranché les pensions, le moindre de vos Officiers pouuoit faire cela; appuyé de vostre auctorité, il ne faut faire qu'un trait de plume; mais espluchons le reste

de son bon mesnage. La Bretagne a voulu acheter aux despens de la Prouince le Marquisat de Bel-Isle, moyennant douze cens mil liures, à condition d'en iouir trois annees; au bout desquelles ceste terre retourneroit à la Couronne. Vostre Surintendant l'a empesché, & au rebours il vous veut faire acheter le Comté d'Allet huit cens mil liures des deniers de vostre Espargne, à dessein de s'accommoder de ceste piece. Les Orfeures de Paris poursuiuent de faire bastir le pont au change de pierre de taille à leurs despens, le Marquis ne le trouue pas bon, & ainsi de mille autres propositions qui se passent dans vostre Royaume.

On auoit eu esperance que l'admission du Cardinal de Richelieu dans vostre Conseil donneroit quelque facilité pour trouuer les expedients conuenables de remedier à tous ces maux, & de faict le Chancelier scachant sa promotion dict à son fils que la porte estoit fermee à leur restablissement, & qu'il auoit predit plus d'un an auant sa disgrace que les affaires de V. M. tomberoient entre ses mains, pour n'auoir iamais veu homme si tost

faict que cestuy-là.

Cependant depuis qu'il est au Conseil de V. M. on ne remarque pas que les choses y aillent beaucoup mieux : seroit-il bien possible qu'il fust deuenu si aueugle que de ne point veoir les impertinences qui se passent? contribueroit il bien activement a de si perilleux pas de clerc? ou bien si pour n'irriter les Fees il acquiesce passivement à ces desordres prenant la qualité de Pere Souffrant, quoy qu'il n'en aye point le nom.

Neantmoins estant bon Theologien, comme il a paru autresfois sur le banc de Sorbonne, dont il est maintenant le chef, il ne peut ignorer qu'une obmission de chose deuë n'equipole à vne commission de chose deffenduë, & lisant ces mots de saint Paul (Corde creditur ad iustitiam, ore autem fit confessio ad salutem ,) il faut qu'il aduouë qu'on n'est pas quitte deuant Dieu & deuant son Prince d'auoir des bons sentimens, si on ne les faict cognoistre publiquement, ainsi qu'on y est obligé.

Ceux qui publient sa probité & son courage, & qui disent que son zele est si

xlviij

grand qu'il mourroit volontiers pour rendre quelque signalé service à V. M. & à l'Estat, adioustent aussi qu'il ne veut servir dans le Conseil que conformément à l'entree qu'il y a fait par vostre commandement, qu'il est homme de compagnie; & qu'il veut viure en société avec tous.

A cela, Sire, ie responds qu'il y a de la contrariété: car comme pourra-il servir V. M. sans contredire à tant de propositions pernicieuses qui se font contre vostre service? Et comment y contredira-il, si pour viure en société: il apprehende de déplaire à ceux qui ont plus de credit que luy? ie le prie qu'il trouue bon que ie luy die icy qu'il est en estat de ne desirer quel'honneur, & qu'il n'en peut meriter en se laissant aller aux passions du tiers & du quart.

Aureste, il se trompe grandement s'il croit que la Vieuville l'en estime davantage pour cela, il faut que le Cardinal sçache que le Surintendant le craint comme le Diable, & le hait comme la mort, le deschirant secrettement par tout comme son capital ennemy. C'est pourquoy les Courtisans speculatifs s'estonnent que le
Marquis

Marquis ait consenty qu'il fust admis dās le secret, attendu qu'un de ses Confidens a dict à plusieurs qu'il cognoissoit qu'en certain sens, le Cardinal estoit la derniere personne qu'il deuoit desirer dans le Conseil : mais qu'il auoit esté contrainct de le faire ainsi, pour le grand fais des affaires, & par la haine publique, laquelle il a creu estourdir par sa reputation pour vn temps, pendan lequel il pourroit rechercher quelques autres inuentions pour subsister.

Le scay encores que la Vieuille deschargeant son cœur à vne personne de grande qualité luy a dict qu'il recognoissoit que le Cardinal de Richelieu auoit de grands talents, & que ce qui l'affligeoit le plus estoit qu'il ne pouuoit trouuer le moyen de le gagner : de sorte qu'il luy estoit impossible de s'asseurer de luy; mais qu'il auoit mille moyens d'arrester ses progres.

Qu'il empescheroit bien que V. M. ne goustast son esprit, luy disant qu'il estoit Royne-Mere, & vous donnant quand il vouldra ombrage de l'affection de ceste Princesse enues sa Monsieur, ou faisant re-

I
uenir Monsieur le Prince en Cour pour
l'opposer à la Roynes; iusques là qu'il s'est
vanté à vn Duc il n'y a pas long temps,
qu'il auoit vn ascendant sur vostre esprit
iusques à ce poinct, que quand il voudroit
il mettroit la Roynes Mere aussi mal avec
V. M. & Monsieur le Prince aussi bien
qu'il ait iamais esté.

Bref, Sire, il pense comme vn second
Mitridatte asseurer sa vie dans le poison:
c'est à dire dans la finesse & souplesse de
ses tours. Que si ceste haine continuë,
comme il desmord iamais, le Cardinal
doit faire estat de se veoir bien tost reduit
au nombre des ieunes Medecins qui
chommes faute d'employ.

Voila comme le Marquis traite tous
ceux qu'il hait, estant d'une humeur si
mordante qu'il faut qu'il se mange soy-
mesme, s'il ne deschire les autres, ne pou-
uant souffrir ceux qui remarquent ses
deffauts, & de là vient la haine qu'il porte
au mareschal de Bassompierre, à cause qu'il
estalle trop publiquement ses imperti-
nences. Ainsi il n'est pas vostre Ministre,
Sire, mais bien celuy de ses passions & in-
terests, mesprisant toutes les affaires ge-

nerales pour vacquer aux intrigues, qui n'ont autre but que de faire paroistre noir ce qui est blanc, pour se maintenir au prejudice de tout le monde.

S'il y eust iamais esprit bourru, fou, & mal-faisant, c'est celuy du Marquis. Que si l'on veut prendre la peine de parcourir sur les deportemens de sa vie, on trouuera qu'il a donné mille afflictions à sa mere, & qu'il a forcé son pere à se despouiller de ses charges pour l'en reuestir. Qu'il a mis sens dessus dessous la maison de Neuers, de laquelle luy & son pere ont tiré tout leur honneur & auancement; avec quelle lascheté a-il laissé perdre la Citadelle de Meziere? Quelle artifice plus noir se peut-on imaginer que celuy qu'il a fait au Comte de Schomberg, en faisant semblant d'estre son intime amy, afin de mieux persuader à V. M. que tous les rapports qu'il faisoit de luy estoient veritables, bien que la verité n'aye encores iamais forté de sa bouche.

Semblable tour a-il ioué au Chancelier & à Puisieux, ne s'estant au commencement lié en apparence avec eux à autre intention que pour les perdre: & la prin-

principale methode qu'il tient pour ruyner les hommes , est d'attirer des mouchards qui luy viennent dire avec grand mystere quelques sornettes à l'aureille, puis il faict semblant à V. M. qu'il descouvre toutes les cabales de ceux ausquels il veut nuire, ou ausquels il veut casser les os, ainsi que disoit le Pere Arnoul quand il auoit rendu vn mauuais office à quelqu'un.

Soudain qu'il veit les choses disposees à chasser le Chancelier, il fait sa brigue, comme il fait encores, pour faire tomber les Sceaux au President le Iay, ce que ne luy ayant reüssi, il essaya de le ietter dans vostre Conseil. Il a faict aussi tous ses efforts pour y faire entrer le Duc d'Angoulesme sous diuers pretexte.

N'a-il pas faict mille faux rapports du Colonel d'Ornano, à dessein de le faire chasser, & par ce moyen mettre près de Monsieur quelques-uns à sa poste, comme le Duc d'Angoulesme, le General des Galleres, le Marquis de Raigny, le Baron du Tour, Ioyeuse, ou autres de sa confidence. Combien de proiets s'est il forgé pour pratiquer quelque alliance, afin d'agrandir sa maison. Il a proposé de donner

sa fille au fils dudit Duc, il l'auoit voulu donner auparauant au fils du Marechal de Crequy, mais ce dessein fut aussi tost estouffé que né dans son esprit. Du depuis il a pensé faire alliance avec le Marquis Desportes pour s'appuyer des Ducs de Montincency & d'Vzes, en quoy il n'a peu non plus trouuer son compte à sa fantaisie.

Il n'y a Estat en France sur lequel il ne iette les yeux. Il auoit mis son coussinet sur la Lieutenance de Bretagne & Gouvernement de Blauet, ce qu'il eust faict reüssir si le Duc de Brissac y eust voulu entendre. Il a pressé V. M. de recompenser Sedan pour s'y establir. Il a voulu vous faire achepter la principauté de Chasteau Regnault quatre cens mil escus, à mesme intention. Il a faict susciter des plaintes contre le sieur de Palaiseau pour luy oster Calais. Cependant, Sire, on a remarqué que le feu Roy ne voulut iamais donner aucun Gouvernement de forteresse au Duc de Suilly, d'autant qu'il est perilleux de conferer des places frontieres à ceux qui ont le maniement de vostre bourse. Il a voulu auoir la charge de General des

liiij

Galleres , mais l'apprehension qu'il a eu que le Duc de Guise ne le traittast à la mode du Secretaire qu'il feist razer, l'en a degousté. Il a vne grande passion d'auoir l'Estat d'Amiral, ainsi que le Duc d'Angoulesme l'a faict entendre à plusieurs, & mesme au Duc de Guise & au Grand Prieur entre les mains de qui ceste charge seroit beaucoup mieux qu'en celles d'un homme de telle farine, qui en est du tout incapable, & qui n'y pense que pour s'asseurer d'un cheual de bois pour transporter les volleries de son beau-pere & les siennes. Il a pensé à la Lieutenance de Normandie, & aux places du Colonel; mais il apprehende qu'on ne voye trop clairement qu'il a voulu plumer ce corbeau pour se reuestir de ses plumes.

Vn iour il cabale avec Monsieur le Prince, vn autre iour il donne esperance à Madame la Comtesse qu'il fauorisera ses hault-pensiers; puis après il la gourmande selon ses quintes & caprices iournalieres. Tantost il promet à Monsieur le Comte des merueilles, & en derriere se mocque de ce genereux Prince qui a si dignement seruy V. M. deuant la Rochelle, où il a

tesmoigné & tous les siens , de quel zele & affection il est porté au bien vos affaires. Cependant la Vieuville n'a pas trouué bon ce que ce ieune reietto du sang Royal aytaucun employ en vos armées.

Il a esté si impudent de dire à vn sien confident qu'il pourroit bien estre vn iour grand Marechal des logis , pour marquer le Bois de Vincennes pour Palais à Monsieur.

Pour endormir le Parlement , il promet à ces Messieurs au voyage qu'ils feroient à Compiègne , qu'il ne se passera aucune chose, dont il ne leur rende compte: mais ils ne doutent pas que ce compte sera aussi fidelle que ceux que son beau-pere a rendu à la Chambre.

Voila comme sa vie n'est qu'un dessein perpetuel d'intrigues , qui n'a autre fin que de nuire à vn chacun , & de reculer ceux qui peuvent mieux servir V. M. que luy, estant de la nature des diables qui destruisent & n'edifient rien , ou des aspics qui enueniment ce qu'ils touchent , & mordent tout le monde: Si on peut trouver sa nourrice , ie veux qu'on me fasse

porter la barbe à la Filouze, si elle ne témoigne que la Vieuville n'eust pas plus tost des dents qu'il mordoit en la tétant.

Mais ce qui est le plus abominable de tout pour le bien de vos affaires, Sire, c'est qu'il se veut attribuer vostre aurreille tout seul; destournant V. M. de prendre croyance en ses autres Ministres, qui est vn sacrilege d'Estat, le plus pernicious qu'on puisse imaginer, & de plus perilleuse consequence.

Considerez, Sire, si V. M. peut estre dignement serui d'un tel homme, & en quel peril il met vostre Couronne, en iouant de tels tours à vos Conseillers, ce qui fait preiuger aux gens de bien son naturel malicieux, & apprehender les inconueniens d'une si malheureuse conduite.

Mais ce n'est pas tout; Sire, il faut approfondir la suite de ses finesse, à quoy luy & son beau pere s'occupent plus qu'à ruminer sur vos affaires, tant l'apprehension d'estre recherchez les talonne, & tant ils ont crainte de cheoir dans la fosse qu'ils preparent aux autres.

Voyant

Voyant qu'il n'estoit assez puissant, ny d'esprit, ny de credit, pour gouverner seul, & pour resister au commencement à l'enuie des Grands, il s'est aduisé d'introduire le Cardinal de Richelieu dans vostre Conseil, non pour restablir l'ordre; mais seulement pour desguiser le bolus de casse qu'il a fait aualler au Colonel, & d'un meisme coup animer Monsieur vostre Frere contre la Royne Mere, semant la diuision où l'amour deuroit estre inuolable.

Il s'est hasté encores de l'introduire pour se descharger sur luy du mescontentement que le Comte de Soissons auoit de la ruptre de son mariage avec Madame, comme aussi pour donner l'endosse audit Cardinal de tous les accrochemens qu'il preuoyoit arriuer dans les negotiations de Holande & d'Angleterre. Et ce qui est de plus detestable, c'est qu'on assure, qu'il fait estat d'entretenir V. M. en continuelle ialousie avec la Royne vostre Mere: mais le public espere, Sire, que Dieu versera son foudre sur ceux qui vsent de tels artifices: & qu'au rebours il estendra ses saintes benedictions sur

lviiiij

ceux qui cōtribuent à l'vnion de la Mere
& du fils.

A toutes ces pernicieuses intrigues
Sire, V. M. doit couper promptement la
racine, si elle desire heureusemēt regner,
& d'un mesme pas aduiser aux resolutions
qu'elle doit prendre sur les importants af-
faires du temps & desordres inueterez
de vostre Estat; la conuiuence ny le pate-
linage n'est ans plus de saison, la necessité
vous pressant de mettre la main à l'œu-
re à bon escient, si auez enuie de preue-
nir les perils qui menassent vostre Cou-
ronne. Autāt vaut, dit le prouerbe, bien
battu que mal battu, faites tant que vou-
drez le complaisant avec la Señora doña
Iberia, asseurez vous qu'elle ne vous par-
donnera iamais, & mettra aussi peu en
consideration tous les signalez plaisirs
que la France luy a fait de l'auoir laissé
establir dans la valtoline, à Iuliers, au-
Palatinat, & par toute l'Allemagne.

Vous traictez avec les Holandois,
vous escoutez les Conseils de Sauoye &
de Venize, vous entrez en alliance avec
l'Angleterre, vous auez donné retraite
à Mansfeld, soyez certain, Sire: que lors

qu'elle verra son ieu qu'elle ne manquera de vous ramenteuoir Catholiquement tous ces pechez mortels , & aurez beau alleguer que vous estes meilleur Catholique qu'elle , que vous n'avez point veu Mansfeld , croyez comine aux Saints nouueaux que toutes ces excuses n'empescheront point que ceste bonne Dame ne veille iour & nuict pour vous prendre sans verd. C'est pourquoy V. M. doit resoudre hardiment les choses qui regardent sa conseruation , elle doit veoir librement Mansfeld , l'employer promptement , maintenir ses anciens Alliez , sans s'arrester aux speculations des Moines , ny du Nonce , lesquels ne preschent que l'interest du Pape , & non celuy de vostre seruice.

Mon Dieu , Sire , qu'un certain paisan auoit bonne grace disant que si chacun ne se mesloit que de son mestier , que les vaches en seroient bien mieux gardées. Ainsi veritablement si Espagne & Italie ne s'entremesloient pas tant dans les affaires de France V. M. en eut esté & seroit beaucoup mieux seruie. Non , non , Sire , il faut que vous terrassiez toutes ces

lx

cabales , ou que vous vous refoudiez d'endurer d'oresenauant mille niches & mille affronts de vos voisins.

Scachez , Sire , que deux choses sont capables d'acheuer de ruiner vos affaires , l'vne le descry que les Estrangers font de la mauuaise conduite de la Vieuille & de son esprit quinteux ; l'autre, l'inueterée caballe de la categorie Espagnole , qui sous le pipeur pretexte de la gloire de Dieu , ont tantost escroulé & infecté ce qui restoit de solide dans vostre Royaume , & qui vous ont engagé astucieusement en vne guerre ciuile, afin quel'Espagnol n'eust point d'empeschement du costé de la France durant ses conquestes d'Allemagne ; tant ont eu de force les ressorts que les Roys Philippes ont tousiours faict iouier pour faciliter leurs entreprises. Et de la vient que les bons François ont remarqué que ce n'est pas d'aujourd'huy qu'ils sont en iouissance de couvrir leur malice du voile de la Religion , & de l'auctorité du saint Siege, qu'ils ont de tout temps forcé de seruir à l'accommodement de leurs interests. C'est pourquoy Pasquil rencon-

tra iudicieusement quand il dict que le Pape estoit porte manteau du Roy d'Espagne. Or comme la Religion s'est au iourd'huy conuertie en vne perilleuse faction, en ce que l'on n'en prend quel'apparence pour produire de mauuais effects, prenez garde, Sire, aux pieges que l'on a rendu à la France sous ceste belle cape Espagnole, & vous souuenez qu'un esprit qui a couru apres le froc, comme celuy du Marquis, n'est pas assez subtil pour garantir vostre Estat contre les astucieuses pratiques d'une telle cabale.

Pour conclusion, Sire, la Voix Publique crie par tout que la Vieuille n'est point assez expert Medecin pour trouuer les remedes salutaires à la guarison des playes de la France. On le tient veritablement pour grand personnage en matiere de ses interests, boutades & intriques: mais qu'il ait le talent de pouuoir conseiller un grand Roy comme V. M. dans les importans affaires du temps present, & de scauoir la methode necessaire pour desbrouiller nos desordres, ou preuoir nos malheurs, c'est ce qu'on luy desnie tout à plat, d'autant que on luy

lxij

prouuera que ses Mathematiques sont aussi mal arengees dans sa teste , que ses conceptions y sont confuses ; outre qu'il est impossible qu'un homme qui n'ayme à vous rapporter aucune affaire , qu'il n'aye premierement trouué dedans un notable interest pour luy , puisse iamais dignement servir le public , ny manier vos affaires comme il faut.

Ceux neantmoins qui veulent honnestement excuser les deffaus de la Vieuille disent qu'il a par rencontre des bonnes conceptions , par interualle des bonnes humeurs , & par fois des bonnes heures , qui sont neantmoins tous indices d'un esprit fanatique & lunatique. Hé ? quoy , Sire , voudriez vous bien confier vos affaires à une ceruelle subiette aux influences de la Lune ? On ne peut croire cela de V. M. elle est trop sage pour courre risque d'un tel hazard , elle sçait qu'il , ny a point de plaisir à faillir en matiere de Gouuernement. Un Prince ne peut estre trop prevoyant en telles affaires , les fautes qui s'y cōmettent par fois en une heure ne se peuuent bien souuent reparrer en cent ans. On peut bien faire des

playes en se iouant: mais, Sire, elles ne se guarissent iamaïs qu'avec douleur.

Le Roy de la grande Bretagne a laissé perdre le Palatinat comme par gayeté de cœur, & il coustera la vie & la ruïne d'un million d'hommes pour le reprendre. Nous auons peu facilement empescher la perte de la Valtoline, Gueffier n'oseroit auoir dict le contraire, & il faut au iourd'huy remuer toute la Chrestienté pour la recouurer. Et si l'on continuë encore à viure de la forte, les Regimens de Vardes & de Ioyeuse, ny la compagnie de cauallerie du fils du Surintendât, qui n'a pas encores de hault de chausses, ne vous garantiront pas contre les attentats de vos voisins, ny toutes les belles excuses du Marquis ne vous sauueront pas du naufrage.

En vn mot, Sire, vostre Surintendant promet trop à V.M. pour bien tenir, parle trop pour bien faire: la du Vernet ayant raison de dire, que tous ces grands parlaïres sont petits faiseurs, lesquels se plaisent au caquer, ne pouuant payer contant leurs hostesses. La Vieuille est de ces gens là, Sire, les effects n'estans

lxiiiij.

qu'au babil. On approuue bien qu'il entretenne de gentilles fornettes les personnes auxquelles il refuse finance ; ainsi que Bassompierre faict de bonne grace ceux qui luy demandent de l'argent : car on ne scauroit trop honnestement caioller telles gens pour les contenter. C'est en cest endroit que les trainees de paroles sont bonnes ; mais à l'aureille d'un grand Roy, elles sont inutiles , voire tres nuisibles. Le Marquis faisoit tous les iours perdre plus de temps à l'escouter qu'il n'en faudroit à resoudre mille bons affaires pour le seruice de V. M. Cependāt il veut tousiours parler , & ne scait par ou commencer.

Il y a six mois que toute la France attend le bon heur qu'il promet à l'Estat par la reformation qu'il se vante d'y apporter : neantmoins personne n'a encores veu de ses miracles , non plus que ceux de Madame Acarie. Tout ce en quoy il a bien rencontré , c'est d'auoir estably la Surintendance dans l'Espargne chose qui ne s'est iamais veüe en quelque Royaume, que ce soit, de mettre
en

en vne mesme maison deux charges de telles importâces pour le maniemment des finâces, & d'auoir mis la Frâce en la garde de Dieu: car veritablement on peut affermer, Sire qu'elle est abandonnee des hommes estant entre les mains de la Vieuille, la veuë duquel est trop courte pour preuoir ce qui est necessaire au salut du public, & sa teste trop pleine de fat pour scauoir remedier au mal'heureux fatum de ce siecle, n'estant pas croyable (comme a sceu tres-bien dire le Pere Guerin) que la Vieuille ait esté presomptueux iusques à ce poinct là, que d'auoir osé persuader au monde qu'il n'est pas fou.

De là vient qu'un Pere Recolet grand physionomiste, entendant quelques-vns qui se plaignoient de ce que le Marquis trompoit tous ceux qui auoient affaire à luy, il leur remōstra charitablement qu'ils s'abusoient, en ce que tout au contraire la Vieuille ne pouuoit tromper personne. Et comme on luy en eust demandé la raison, il ne fit autre responce, sinon qu'il auoit beau contrefaire l'entendu, que sa mine le faisoit tousiours recognoistre pour vn esceruelé; & que s'il se mesloit

lxvj

plus long temps des affaires, qu'on seroit plus en peine de luy trouuer vne place à S. Mathurin qu'à la grande Chartreuse.

Voila, Sire, l'estime qu'on fait de la Vieuuille, qui est tenu en effect pour si grand personnage, que le Public a ceste croyance que l'Historiographe Bernard ne mettra iamais liure en lumiere, sinon ceux qu'il remplira de la compilation des faicts chimeriques du Marquis.


C'est, Sire, ce que j'ay recueilly de la Voix Publique sur son suiet, & pour finir ie supplieray tres-humblement V. M. de se faire lire certains vers qui se trouuent dans les vieilles Centuries de Nostradamus imprimees à Lion en l'an 1554. desquels ensuit la teneur,


Quand en Iudas de Cité vieille jffu
Des vieux Frâcons gouvernera la bourse
Lors tout Gaulois par luy sera desceu
Et maux des lis delà prendrôt leur source.


Après cela y pense qui voudra, le Clergé, la Noblesse & toute la France a interest qu'un si capricieux Pilote tiene le gouvernail du nauire, ne faisant doute suivant ceste Prophetie, que ceste vieille Cité ne laisse briser nostre vaisseau au tra-


uers des escuels de la faction Espagnole, contre laquelle chacun sçait qu'il est trop mal habile pour nous en sçauoir desmesler.


Au surplus si Messieurs les Ministres desirent que le peuple prie Dieu pour le bon Conseil du Roy, ainsi que tous vrais subiects y sont obligez, qu'ils se mōstrent plus vigoureux à resister au mal, sinon que le Cardinal de Richelieu duquel on espere mirabilia, s'en aille à Rome pour y gagner les pardons, le Connestable à Grenoble, le Garde des Sceaux aux Bernardins en la place de du Vair, & le Marquis de la Vieuille garder Maizieres, pour s'y preseruer d'anatheme. Amen.














See





